

ՂՈՌՈՔՈՒՂԱ.- (Հանկարծ գլխի ընկնելով՝ պայթում է մի հսկայական ծիծաղով:) Փա՛հ, փա՛հ, փա՛հ, փա՛հ...

ՄԻՒՍ ՅՍԿԱՆԵՐ.- Յո՛, հո՛, հո՛, հո՛, հո՛, հա՛, հա՛, հա՛, հա՛ , հո՛ւ, հո՛ւ, հո՛ւ, հո՛ւ...

Պալատականները սկսում են կողոպտել պալատը՝ թանկագին իրերը խոթելով գրպաններն ու ծոցերը, միաժամանակ շարժումներ անելով փախչելու, վախենալով ինչ-որ սպառնալիքից: Ներս է վազում Ուստիանը եւ հետը բերած պարկը լցնում զանազան իրեր: Վարագոյրը փակում է:

ՆԱԶԱՐ ԵՒ ՍԱԶՈ.- (Աւանսցնի երկու կողմից գոռալով ընկնում են իրար գիրկ եւ վայր թափում սարսափահար:)

ՊԱՐԶԱՇԵՆՑԻՆԵՐ.- (Ներս են մտնում աւանսցենա եւ հոմերական ծիծաղով շրջապատում Նազարին ու Սաքոյին:) Մթնում է: Կրկին լուսաւորում է: Աւանսցենը դատարկ է: Ներս է մտնում Ուստիանը մահակը ձեռին ու պարկը շալակը: Նայում է չորս կողմ: Շփոթուած է:

ՈՒՍՏԻԱՆ.- Բա որ ասում էի երազ է՞... Է՛ս էլ բախտ է... (հեռանում է:)

ՎԱՐԱԳՈՅՐ ՓԱԿՈՂ.- (Խորքից ներս է գալիս եւ առաջանում դէպի ռամպան): Բախտ չէ, Ուստիան՝, հիմա՛ր իմաստուն, այլ խրտվիլակներ եւ խաբեութիւն: Յեթիաթ է սա հին, երազ չարաղետ, անցաւ, գործ չունենք այլեւս նրա հետ: Էլ ի՞նչ թագաւոր, ի՞նչ Նազար, ի՞նչ բան: Փչեմ՝ կմթնի այս բեմն ու ռամպան:

Փչում է: Բեմը մթնում է: